

Date – 22/08/2025

Time - 18:30 Hrs

HEADLINES (EVENING)

1. Prime Minister Narendra Modi an thla thar September ni 13 khian Sairang leh Bairabi inkar Rel kawng a hawng dawn.
2. Chief Minister Pu Lalduhoma'n sawrkar laipuia hotute phalna in Mizoram chuan hnamdang hnawhchhuah runpui an nei dawn a ti.
3. LADC Chairman atan Pu VL.Hmuaka thlan a ni a, Chief Executive Member Pu N.Zangura'n sessionah fiahna a paltlang baw.
4. Ramchhunga tribal te chawikanna tur Aadi Karmayogi Abhiyan – Responsive Governance Programme chungchang state level inhrilhhriatna chu vawiin khan MINECO ah neih a ni.

<><><>

PM TO VISIT MIZORAM

Prime Minister Narendra Modi an thla leh September ni 12 hian zan khat riakin Mizoram a rawn tlawh dawn a, September ni 13 ah Sairang leh Bairabi inkar Rel kawng a hawng ang.

Chief Minister Pu Lalduhoma chuan vawiina MPS Annual General Conference Arya Mess, PHQ-a a hmanpuinaah he thu hi sawiin Prime Minister in rel kawng a hawn tur chungchangah hian Union Railway Minister Ashwini Vaishnaw nen an inbe zing hle tih sawiin Mizoram sawrkar chu theihtawpin a inbuatsaih a ti a, world class rail station-a thuam tur leh Rajdhani Express service thei tura ruahman a nih thu sawiin, Inner Line Permit (ILP) check na tur counter an siam pawh pehhelna tur a awm dawn lo a ti.

Chief Minister chuan Mizorama rel alo luh chuan hnamdang mi tam tak an lo luh tawh dawn avangin ILP check tu tur Police awm sa te chu an indaih loh bakah building leh hmanraw dangte pawhin a zir lo a ti a, hei vang hian ILP endikna chu online a kalpui theih turin hma an la mek a ti a, awlsam zawkin tutenge an awm tur chin pela awm tih te an hre zung zung thei tawh dawn a ti.

<><><>

CM

Chief Minister Pu Lalduhoma'n sawrkar laipuia hotute phalna in Mizoram chuan hnamdang hnawhchhuah runpui an nei dawn a ti.

He thu hi vawiina MPS Annual General Conference Arya Mess, PHQ-a a hmanpuinaah sawiin Mizoramah permit nei lova hnamdang awm an tam lutuk chu Mizoram sorkarin a vei hle a ti a, a hnawhchhuah naah tunhmaa an man khawm a, an haw na tur lirthei an ruahman sak thin ang kha ni tawh lovin, local council huamchhunga phalna nei lova vai chengte chu Police, Local council leh NGO te nen haw turin an hrilh mai tur a ni a ti a, an rawn kalna tur pawh an in ruahman sak theih chuan an haw na tur ruahman sak a ngai lo tih a sawi baw.

Pu Lalduhoma chuan India rama state ralmuang bera Mizoram an inchhal ngamna chhan chu venhimna hna thawktute vang ani a ti a, ram nuam tehna chu a mipui zalenna leh ralmuanna a ni a ti.

<><><>

ZMC

Health Minister Pi Lalrinpui'n Zoram Medical College & Hospital-in Ministry of Health and Family Welfare endikna sang berah inhlangkaiin, National Quality Assurance Standards (NQAS) Certified Hospital a ni thei chu hmasawnna nasa tak a ni a ti.

Vawiina ZMC&H-in NQAS Certified Hospital an nih lawmna inkhawm a hmanpuinaah he thu hi sawiin, Health Minister Pi Lalrinpui chuan tunhma chuan Mizoram sorkar damdawi inte a tawp thei hle a, inthiarna hmun te chu a tawp zual a ti a, Mizoram Health System Strengthening Budget an kalpui chhoh hnuah damdawi thianghlim leh fai nei turin theihtawp an chhuah chho a ti a. ZMC&H chu NQAS Certified Hospital-ah puan a ni leh nau neihna lama hospital tha bik (LAQSHYA) Certificate an dawng thei chu NQAS Certification leh a kaihnawih an neih theihna atana inbuatsaih nan Internal Performance Agreement (IPA) fund an pek chhuah a tha thei ang bera an hman tih lantirtu a ni tih sawiin, lawmawm a tih thu a sawi.

Health Minister hian MUHCS hnuaiia thuam thar, Private Cabin 30 leh ICU khum 13 dah belh te bakah ward hrang hrangah khum engemaw zat dah belh te a hawng a ni.

He hunah hian Bialtu MLA Pi Baryl Vanneihsang pawhin thusawiin, Mizo khawtlangin hmeichhe Politician te an rintawk loh laiin, ZMC&H-in NQAS Certified Hospital a dawng thei chu Health Minister Pi Lalrinpui hmalakna vang pakhat a ni a ti a, Mizo hmeichhe Politician te thiltihtheihna tilangtu a ni tih sawiin, Mizoram inthlanpui lo la awm turah pawh hmeichhiate tan ngawng tha a neih a rin thu a sawi a ni.

<><><>

LADC

Lai Autonomous District Council Chairman atan Pu VL.Hmuaka thlan a ni a, Chief Executive Member Pu N.Zangura'n sessionah fiahna a paltlang baw.

Vawiin khan Lawngtlai LADC Session Hall-a Protem Chairman Pu Lalthanmawia Colney kaihhruai sessionah Chairman thlanna neih a ni a, United Democratic Alliance atang a hming pelut, Lawngtlai Vengpui bialtu MDC Pu VL.Hmuaka chu chuhtu awmlovin Chairman ah thlan a ni.

Chairman thar Pu VL.Hmuaka kaihhruaina hnuaiia vawiin chawhnu dar 2 khan Chief Executive Member, Pu N.Zangura'n thlawptu a neihdan House ah fiah a ni a, CEM thlawp lamah Member 14 in ban pharin, thlawplo lamah Member 5 in ban an phar a, Chairman Pu VL.Hmuaka chuan Pu N.Zangura CEM chuan fiahna a paltlang thu a puang.

CEM chuan LADC a Sorkar mumallo vanga nasataka tawrhna karah, fiahna a paltlang thei chu Pathian remruat a ni tih sawiin, Member te chungah lawmthu a sawi a.

A kaihhruai Sorkar chuan diktakin rorelna kalpui an tum tih sawiin, Sum harsa leh indaihlohna nasatak karah, a nihdan tur taka sum hman a pawimawh thu a sawi a, LADC hnuaiia Officer leh thawktu dangte pawh, Sorkar thatak din a nihtheih nan an hmasawnah thahnemngai taka thawkturin a chah.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

AADI KARMAYOGI ABHIYAN

Aadi Karmayogi Abhiyan – Responsive Governance Programme chungchang state level inhrilhriatna chu vawiin khan MINECO ah neih a ni a,

He hun hmanpuitu Ministry of Tribal Affairs Joint Secretary Pu Roumuan Paite chuan mipuite telna sawrkar, rorelna inkhaidiat tha tak leh chak tak siam turin hmalak mek zel a ni a ti a. Chumi ti chak tur chuan Aadi karmayogi Abhiyan – Responsive

Governance Programme chu duan a ni a. He mission hnuaiah hian ramchhunga tribal zawng zawngte leh an chenna hmun nen lam ti hmasawn turin sawkar inrelbawlha tha tak kalpui a ni dawn a ni a ti.

He mission hnuaiah hian department hrang hrangte'n mahni chanvo theuh te tlin taka hlen tura ngen an ni a. Village Council /Local Council zawng zawngte pawh he mission hnuaiah hian Special Gram Sabha-te lo nei tur leh, Gram Sabha remchang apiangah remchang siama mipuite a tam thei ang bera an hriat theih nan leh thawhhona tha kan neih theihna tura hma lo la tura ngen leh hriatir an ni bawk.



POL PARTY PR

Mizoram Pradesh Congress Committee MPCC President Pu Lal Thanzaran Dampa bial lama an Block president pakhat leh mi tlemte bakah 2023-a an party Candidate Pu Lalhmingthanga Sailo ten BJP zawm an tum nia an hriat thu a sawi.

Vawiina an party inkhawm, Aizawl-a Congress Bhavan-ah he thu hi sawiin Dampa biala an mite chuan thlemna an do zo lo a ni a ti a, an uiawm a tih rualin an khawngaihthlak a ti a, centrala rawih lam pan party an zawm tur chu an uiawmin a vanduaithlak takzet a ni a ti.

MPCC President chuan I&PR thuchhuaha Chief Minister thusawiah chuan ram zalenna humhim tur leh ram hma a sawn zel theih nan Prime Minister Pu Narendra Modi a thawhpuite kut tichak tura zoram mipuite a sawm thu an tarlang tih sawiin, Kristian sakhua dodaltu BJP kut an tihchak chuan enge an chan tur chu a hriatthiam theih mai a ni a ti.

Hetihlai hian BJP Mizoram State President Dr K Beichhua chuan vawiin vek khan an party Office Aizawlah thusawiin BJP chuan dawt politics an khel ve dawn lova, ram hmasawnna a hmuh theih nan a thawhin an thawk zawk dawn a ni, a ti.

Dr. K. Beichhua chuan, inthlan dawnah Politician-te'n an tih theih loh tur hmangin, tlin duh avangin mipui hmaah an intiam a, tawngkam maia politics an khel thin a ni a ti. Pastor Chhawna inlarnaah chhimlam atangin pangpar lo par tur thu a lo sawi lawk tawh chu a thleng mek a ti a, MADC-ah BJP a sawrkar a, LADC-ah BJP kaihhruai a sawrkar mek bawk a ni a ti a. CADC ah pawh BJP lian tak leh tha takin an awm mek a, Lunglei khawpuiah pawh BJP rawn zawm tur a inmung mek a, mi thenkhatte'n BJP nih avanga Kristian lo tur emaw tia ngaihna an nei thin chu pawl a tih thu sawiin chhandamna chu BJP nih leh nih lohah a innghat lo a ti.

